

Putrajaya akan dijadikan sebagai bandar rekreasi pertama negara - Annuar Musa
Astro Awani
13 Mac 2021
Hasimi Muhamad

PUTRAJAYA: Kementerian Wilayah Persekutuan komited menjadikan Putrajaya sebagai sebuah bandar rekreasi pertama di negara ini, selain sebagai pusat pentadbiran negara.

Menterinya, Tan Sri Annuar Musa berkata, langkah tersebut akan memberi nilai tambah dan komersial kepada Putrajaya, sekali gus menjadi lokasi tarikan pelancongan dan menjana pendapatan ekonomi setempat.

Tegas Annuar, bagaimanapun pembangunan yang dirancang tidak akan menjejaskan konsep dan ciri-ciri asal Putrajaya.

"Jadi segala-galanya sudah ada, kita ada tempat yang cantik, landskap yang cantik, tasik yang cantik dan bangunan-bangunan dari seni bina yang cantik. Tetapi kita perlu (perancangan) bagaimana semua ini dapat dipakejkan supaya ia menjadi satu tarikan yang bertaraf nasional dan antarabangsa.

"Apabila hujung minggu seperti ini kita tengok sunyi dan sepi sahaja. Kita mahu apabila hujung minggu orang sekitar Putrajaya atau tempat lain akan datang. Jadi, ia mungkin perlu ada elemen tertentu seperti penganjuran program," katanya kepada pemberita selepas melakukan program 'walkabout' ke Kiosk Usahawan Muda Kota dan Anjung Floria Putrajaya, di sini hari ini.

Jelas beliau lagi, beberapa penyesuaian perlu dilakukan termasuk melihat semula peranan utama Perbadanan Putrajaya (PPj) dalam merangka perancangan masa depan.

Tambahnya lagi, syarikat-syarikat swasta juga dialu-alukan untuk membuat pelaburan dan memberikan idea terhadap usaha merealisasikan bandar rekreasi itu.

"Banyak pihak swasta apabila sebut Putrajaya, mereka 'reserve' sikit sebab berasakan banyak perkara yang tidak boleh (dilakukan) berbanding apa boleh dilakukan (di Putrajaya).

"Sedangkan kalau mereka datang melihat betul-betul banyak sebenarnya (peluang). Jadi, kita kena berikan petunjuk yang betul agar lebih banyak sektor swasta datang melabur.

"Malah, kita juga sedang memikirkan untuk meminta setiap kerajaan Negeri untuk mempamerkan seni budaya mereka di Putrajaya," katanya lagi.

Dalam masa yang sama, Annuar memaklumkan Anjung Floria Putrajaya akan dihidupkan sebagai pusat setempat rekreasi yang dikenali sebagai Pit-Stop@Anjung Floria.

Pemilihan Anjung Floria yang pernah menjadi tapak penganjuran Floria Diraja Putrajaya itu bersesuaian dengan lokasinya yang strategik, selain memiliki panorama dan binaan ikonik yang menarik.

© 2021 Astro AWANI Network Sdn. Bhd. (535275-D) All Rights Reserved.

Source: <https://www.astroawani.com/berita-malaysia/putrajaya-akan-dijadikan-sebagai-bandar-rekreasi-pertama-negara-annuar-musa-287775>